

Na osnovu člana 13. Zakona o principima lokalne samouprave u Federaciji Bosne i Hercegovine („Službene novine Federacije BiH“, br. 49/06 i 51/09), čl. 65. i 66. Zakona o pravima, obavezama i odgovornostima pacijenata („Službene novine Federacije BiH“, broj 40/10), člana 14. Zakona o zdravstvenoj zaštiti („Službene novine Federacije BiH“, br. 41/10 i 75/13), člana 19. stav (4), a u vezi sa članom 31. stav (1) i (3) Statuta Općine Novo Sarajevo („Službene novine Kantona Sarajevo“, broj 5/20 - Prečišćeni tekst i 20/20-ispravka) i člana 47. Poslovnika Općinskog vijeća Novo Sarajevo („Službene novine Kantona Sarajevo“, broj 24/19 – Novi prečišćeni tekst i 20/20), Općinsko vijeće Novo Sarajevo na \_\_\_\_\_ sjednici, održanoj dana \_\_\_\_\_ 2020. godine, donosi

**Nacrt**

**ODLUKU**  
**o osnivanju Zdravstvenog savjeta**  
**na području općine Novo sarajevo**

**Član 1.**

Ovom Odlukom osniva se Zdravstveni savjet na području Općine Novo Sarajevo (u daljem tekstu: Zdravstveni savjet) i utvrđuje se nadležnost, broj članova, sastav te njegov način rada.

**Član 2.**

Zdravstveni savjet obavlja sljedeće poslove:

- predlaže i evaluira sprovođenje zdravstvene zaštite na području jedinice lokalne samouprave;
- daje mišljenje na planove i programe zdravstvene zaštite za područje lokalne samouprave, te predlaže mjere za poboljšanje dostupnosti i kvaliteta zdravstvene zaštite za područje lokalne samouprave, te predlaže mjere za poboljšanje dostupnosti i kvaliteta zdravstvene zaštite na svom području;
- prati primjenu propisa na području jedinice lokalne samouprave koji se odnose na zaštitu prava i interesa pacijenata, uposlenih i zdravstvenih radnika;
- organizuje obrazovne kurseve za građanstvo iz poznavanja materije o pravima pacijenata i postojeće legislative;
- daje preporuke za organizaciju kurseva u zdravstvenim ustanovama radi upoznavanja rukovodstva i zdravstvenih radnika s konceptom prava pacijenata, legislativom i odgovarajućim nužnim promjenama u zdravstvenim ustanovama;
- prati povrede pojedinačnih prava pacijenata na području jedinice lokalne samouprave;
- predlaže preduzimanje mjera za zaštitu i unapređenje prava pacijenata i zdravstvenih radnika na području jedinice lokalne samouprave;
- bez odgađanja obavještava zdravstveni savjet u kantonalnom ministarstvu o slučajevima težih povreda prava pacijenata koji mogu ugroziti život ili zdravlje pacijenata i zdravstvenih radnika;
- podnosi Općinskom vijeću i kantonalnom ministarstvu godišnji izvještaj o svom radu;
- obavještava javnost o povredama prava pacijenata i zdravstvenih radnika;
- obavlja i druge poslove predviđene Zakonom o pravima, obavezama i odgovornostima pacijenata („Službene novine Federacije BiH“, broj 40/10).

U obavljanju poslova iz svog djelokruga rada, zdravstveni savjet je ovlašten upozoravati, predlagati i davati preporuke.

**Član 3.**

Zdravstveni savjet u okviru poslova i zadataka koje obavlja aktivno će biti uključen i imat će partnersku ulogu zajedno sa zdravstvenim ustanovama i nadležnim ministarstvima i drugim organima i institucijama, u donošenju zakonskih i podzakonskih akata i drugih mjera u cilju adekvatnog zadovoljavanja potreba zdravstvene zaštite lokalnog stanovništva, a posebno u situacijama kada je u pitanju otklanjanje određenih riziko-faktora za zdravlje stanovništva (vodopsnabdijevanja, uklanjanje deponija i slično).

#### Član 4.

Zdravstveni savjet ima ukupno 9 članova, uključujući predsjednika i zamjenika.

Općinski načelnik imenuje članove Zdravstvenog savjeta, uz saglasnost Općinskog vijeća.

Izbor članova zdravstvenog savjeta vrši se nakon objavljivanja javnog poziva, koji raspisuje i provodi Općinski načelnik.

Općinski načelnik dužan je raspisati Javni poziv u roku od 60 dana, od dana donošenja ove Odluke.

Prije raspisivanja Javnog poziva, Općinski načelnik donosi Pravilnik o standardima i kriterijima za odabir članova Zdravstvenog savjeta, u roku od 30 dana od dana donošenja ove Odluke.

#### Član 5.

Članovi Zdravstvenog savjeta imenuju se iz reda:

- predstavnika pacijenata,
- mladih,
- predstavnici općinskog organa uprave,
- komora iz oblasti zdravstva,
- stručnih udruženja,
- udruženja za zaštitu prava i obaveza pacijenata,
- sindikata zdravstvenih ustanova,
- udruženja čija je djelatnost prevencija i zaštita zdravlja,
- crvenog krsta/križa sa područja općine,
- zdravstvenih radnika iz zdravstvenih ustanova sa područja općine,
- zdravstvenih radnika privatnih praksi sa područja općine,
- udruženja penzionera
- Službe socijalne zaštite Novo Sarajevo,
- udruženja osoba sa invaliditetom.

Članovi zdravstvenog savjeta moraju imati prebivalište na području Općine Novo Sarajevo.

Članovi zdravstvenog savjeta iz alineje 1. i 2. stava 1. ovog člana, apliciraju na javni poziv samostalno, kao građani.

Članovi zdravstvenog savjeta iz alineje 10. biraju se iz reda ljekara, sestara i socijalnih radnika.

#### Član 6.

Praćenje rada i djelovanja stručnih udruženja i udruženja za zaštitu prava pacijenata iz člana 5. alineja 5. i 6. ove Odluke vršit će, u ime Zdravstvenog savjeta, njegov predsjednik i to kroz redovite izvještaje koje će ova udruženja dostavljati i koja će predsjednik savjeta prezentovati na sjednici savjeta.

U slučajevima kada Zdravstveni savjet ocijeni u skladu sa Pravilnikom o radu i poslovanju zdravstvenog savjeta, da su aktivnosti i djelovanje svakog člana pojedinačno i udruženja na brizi i zaštiti pacijenata nedovoljne ili ukoliko udruženje prestane s radom, izvršit će se imenovanje drugog predstavnika ovih udruženja.

Imenovanje iz prethodnog stava ovog člana izvršit će Općinski načelnik na prijedlog Zdravstvenog savjeta i po osnovu raspisanog Javnog poziva.

**Član 7.**

Predsjednik Zdravstvenog savjeta pokreće inicijativu za razmatranje pojedinih pitanja iz djelokruga rada, saziva sjednice, predlaže dnevni red sjednice, saziva sjednicu uz saglasnost Predsjedavajućeg Općinskog vijeća.

Predsjedavajući Općinskog vijeća i Općinski načelnik imaju pravo inicirati održavanje sjednice Zdravstvenog savjeta, uz obrazloženje.

**Član 8.**

Članovi Zdravstvenog savjeta u svome radu obavezni su postupati tako da ne ugroze obavezu čuvanja službene tajne.

**Član 9.**

Zdravstveni savjet predlaže Općinskom vijeću svoj Plan i program rada za kalendarsku godinu, zajedno sa Programom rada Općinskog vijeća Novo Sarajevo.

O svom radu i aktivnostima Zdravstveni savjet podnosi godišnji izvještaj shodno odredbi člana 2. stav 1. alineja 9. ove Odluke, najkasnije do 31. marta tekuće godine, a po potrebi, na zahtjev Općinskog vijeća i ranije.

**Član 10.**

Zdravstveni savjet donosi Poslovnik o radu savjeta kojim se pobliže određuju organizacija i način rada i donosi Pravilnik o radu i poslovanju.

**Član 11.**

Članovi Zdravstvenog savjeta imenuju se na period od 4 (četiri) godine sa mogućnošću reizbora u skladu sa Pravilnikom o standardima i kriterijima za odabir članova Zdravstvenog savjeta.

**Član 12.**

Prilikom osnivanja Zdravstvenog savjeta poštovat će se princip ravnopravne zastupljenosti oba spola.

**Član 13.**

Administrativno-tehničke poslove za potrebe Zdravstvenog savjeta obavljat će Služba za poslove Općinskog vijeća i lokalnu samoupravu.

**Član 14.**

Članovima Zdravstvenog savjeta pripada naknada za rad, kao i članovima radnih tijela utvrđene u članu 2. stav (2) Odluke o naknadama vijećnicima, članovima radnih tijela i članovima kolegija Vijeća ("Službene novine Kantona Sarajevo", br. 11/19, 45/19 i 21/20).

**Član 15.**

Gramatička terminologija korištenja muškog i ženskog roda u ovoj Odluci podrazumijeva uključivanje oba roda.

**Član 16.**

Odluka stupa na snagu osmog dana od dana objavljivanja u „Službenim novinama Kantona Sarajevo“.

Broj: 02OV-02-\_\_\_\_/20  
Sarajevo, \_\_\_\_\_ 2020. godine

**PREDSJEDAVAJUĆA**  
**OPĆINSKOG VIJEĆA NOVO SARAJEVO**

**Ana Baltić**

## **O b r a z l o ž e n j e**

Pravni osnov za donošenje Nacrta Odluke o osnivanju Zdravstvenog savjeta Općine Novo Sarajevo sadržan je u odredbama člana 65. Zakona o pravima, obavezama i odgovornostima pacijenata („Službene novine Federacije BiH“, broj 40/10), kojim je propisano da se u cilju ostvarivanja i unapređenja prava pacijenata osnivaju zdravstveni savjeti jedinica lokalne samouprave, kantonalnog ministarstva i Federalnog ministarstva zdravstva.

Članom 14. Zakona o zdravstvenoj zaštiti („Službene novine Federacije BiH“, br. 41/10 i 75/13) propisano je da društvena briga za zdravlje na nivou općine obuhvata ocjenjivanje rada zdravstvenih ustanova i kvaliteta zdravstvenih usluga, kao i obezbjeđivanje finansijskih sredstava za unapređenje njihovog rada i kvalitete zdravstvenih usluga u skladu sa potrebama stanovništva i mogućnostima jedinice lokalne samouprave, a ostvaruje se kroz osnivanje zdravstvenog savjeta na nivou općine.

Članom 31. stav (1) i (3) Statuta Općine Novo Sarajevo („Službene novine Kantona Sarajevo“, broj 5/20 - Prečišćeni tekst i 20/20-ispravka) propisano je da Vijeće osniva komisije, odbore, savjete i druga stalna i privremena radna tijela Vijeća, te da sastav, broj članova, djelokrug i način rada ovih tijela utvrđuje se Poslovníkom Vijeća, za stalna radna tijela, odnosno posebnim odlukama o osnivanju povremenih radnih tijela i savjeta.

Poslovník Općinskog vijeća Novo Sarajevo („Službene novine Kantona Sarajevo“, broj 24/19 – Novi prečišćeni tekst i 20/20) odredbama člana 47. propisuje da Vijeće, može formirati zdravstveni savjet u skladu sa odredbama Zakona o zdravstvenoj zaštiti, a broj članova i djelokrug rada zdravstvenog savjeta utvrđuje Vijeće posebnom odlukom.

**OPĆINSKI NAČELNIK**

**Koldžo Nedžad, s.r.**